



COMUNITED DALS VSCHINS
DA SAMEDAN

**Tschantamaints da la
comunitè dals vschins
da Samedan**

**Tschantamaints da la
comunitè dals vschins
da Samedan**

I. Disposiziuns generelas

Art. 1

Comunitad dals vschins La comunitad dals vschins da Samedan as cumpuona dals vschins - homens e duonnas - chi sun domicilios illa vschinauncha da Samedan. Ella es üna corporaziun dal dret public.

Art. 2

Administraziun autonoma l'ls limits dal dret chantunel ho la comunitad dals vschins il dret d'ün'administraziun autonoma.

Art. 3

Champ d'activited Il champ d'activited da la comunitad dals vschins cumpiglia pustüt las incumbenzas seguintas:

- a) da conceder il dret da vschinedi;
- b) d'administrer ils bains resalvos specielmaing als vschins;
- c) da vender, baratter ed aliener, impegner ed agraver permanentamaing bains chi sun in sia proprietad e da cumprar bains cun egens mezs;
- d) da der l'approvaziun per vender ed aliener, impegner ed agraver permanentamaing bains fundiaris chi'd haun appartgnieu già als 7 gün 1984 tar la facultad d'utilisaziun da la vschinauncha u chi sun gniesu acquistos scu cumpensaziun reela da tels;
- e) da cooperer tar la disposiziun regard fer adöver da mezs our dal quint da revev da bains vendieus seguond la ledscha chantunela;
- f) da fixer las taxas pel cungiodimaint vi da la facultad d'utilisaziun da la vschinauncha.

Art. 4

Dret da vuscher Il dret da vuscher in affers da la comunitè dals vschins ho mincha vschin chi'd ho sieu domicil in vschinauncha, sch'el ho cumplieu il 18avel an e nun es miss suot avuo pervi da malatia u deblezza da spiert.
Dal rest as drizza il dret da vuscher seguond la ledscha chantunela davart exerciter ils drets politics.

Art. 5

Elegibilitè, Mincha persuna abla da vuscher es elegibla in ün uffizi da la comunitè dals vschins, sch' ella nun es gnida priveda da sieus drets civics tres sentenzcha penela.
dùreda d'uffizi La perioda d'uffizi d'ura quatter ans. Mincha uffiziant es reelegibel.

Art. 6

Successiun Scha per ün u l'oter motiv ün uffiziant sorta d'uraunt la perioda d'uffizi, schi es da tscherner pel rest da la perioda ün successur. A velan las listessas dispuziuns scu tar las tschernas ordinarias.

Art. 7

Indemnisaziun Ils commembers da las autoritèd da la comunitè dals vschins scu eir ils funcziunaris da la comunitè dals vschins vegnan indemnisos seguond il temp impundieu e seguond las tariffas chi velan pels commembers da las autoritèd e'ls funcziunaris da la vschinauncha politica.

Art. 8

Exclusiun Paraints in lingia directa verticala e quinos, conjughels e fradgliuns nu paun a listess temp fer part a listessa autoritèd u cumischiun da la comunitè dals vschins.
Quists motifs d'exclusiun velan eir pels revisuors da quint traunter els e vers ils commembers dal cussagl vschinel.

Art. 9

Dovair da sortir Ün commember d'ün'authorized u da la radunanza dals vschins ho da sortir tar tractandas e votaziuns, sch'el svesch, sieus conjughels u ün da sieus paraints e quinos fin al grô numno in art. 8 haun vi da quella fatschenda ün interess persunel immediat.
Sur da la dumanda, scha sajan avauntmaun motivs d'exclusiun, decida la relativa istanza in assenza dals interessos.

Art. 10

Dret da petiziun Il dret da petiziun es garantieu. Mincha vschin po preschanter in scrit al cussagl vschinel propostas e pretaisas. Quel es in dovair d'and piglier pusiziun in möd speditiv.

Art. 11

Dret d'iniziativa 20% dals vschins abels da vuscher in affers da la comunitad dals vschins paun dumander cun lur suottascripziun cha vegna vuscho sur d'üna proposta fatta dad els. L'iniziativa po gnir inoltrada illa fuorma d'üna proposta generela u illa fuorma d'ün proget elavuro eir fuormelmaing. Ella es da surder insembel cullas suottascripziuns al cussagl vschinel.
Ün'iniziativa valabla es da tratter al pü tard infra ses mais daspö sia inoltraziun.
La dumanda d'iniziativa po gnir retratta dals prüms tschinch iniziants chi'd haun suottascrit quella fin al mumaint da la votaziun, scha nu figüra üngün'otra clausla da revocaziun.

Art. 12

Infurmaziun,
moziun Illa radunanza dals vschins po mincha vschin cul dret da vuscher dumander ün'infurmaziun sur dal stedi u sur da l'evasiun d'ün affer dals vschins.
Illa radunanza dals vschins ho il votant eir il dret da fer propostas regard üna fatschenda chi nu figüra sülla glista da tractandas. Scha üna tela proposta vain resguardada scu relevanta, schi ho il cussagl vschinel da der in merit illa prosma radunanza ün referimaint ed ho da fer sia proposta.

Art. 13

Dret da recuorrer Il dret da recuorrer cunter las decisiuns e disposiziuns dals organs da la comunitè dals vschins as drizza seguond la legislaziun chantunela.

Art. 14

Respunsabiltè La respunsabiltè dals organs da la comunitè dals vschins per dans ch'els occasiuneschan exercitand lur uffizis as drizza seguond la ledscha chantunela regard la respunsabiltè da corporaziuns da dret public.

Art. 15

Protocol Sur da las trattativas da la radunanza dals vschins, dal cussagl vschinèl e da las cumischiuns da la comunitè dals vschins sun da mner protocols separos.
A la prosma radunanza u tschanteda sun ils protocols da preleger e zieva stos approvos sun els da suottascriver dal prüm cuvih e dal nuder.

Art. 16

Invista
i'ls protocols Ils protocols da la radunanza dals vschins sun avierts a mincha vschin chi'd ho il dret da vuscher.
L'invista i'ls protocols dal cussagl vschinèl e da las cumischiuns es permissa be scha paun gnir fats valair interess chi sun degns da gnir cuschidros.
Al dret da pudair piglier invista po gnir aderieu dand ün extrat dal protocol.

II. L'organisaziun da la comunitad dals vschins

Art. 17

Organs	<p>Ils organs da la comunitad dals vschins sun:</p> <p>a) la radunanza dals vschins;</p> <p>b) il cussagl vschinel;</p> <p>c) ils revisuors da quint.</p>
--------	---

A. La radunanza dals vschins

Art. 18

Radunanza	<p>La radunanza dals vschins es l'organ suprem da la comunitad dals vschins; in quella exerciteschan ils votants abels da vuscher ils drets ch'els haun in affers da la comunitad dals vschins.</p>
-----------	---

Art. 19

Cumpetenzas	<p>La radunanza dals vschins ho las seguaintas cumpetenzas:</p> <ol style="list-style-type: none"> 1. da tscherner il prüm cuvih ed ils oters commembers dal cussagl vschinel scu eir ils suppleants; 2. da tscherner ils revisuors da quint e lur suppleants; 3. da decider davart recuors da petents pel vschinedi tenor la ledscha per l'acquist dal vschinedi; 4. da statuir e da revaider tschantamaints, ordinaziuns e regulativs scu eir da relascher uordens da valor generelmaing impegnativa; 5. da fixer las taxas pel cungiodimaint vi da la facultad d'utilisaziun da la vschinauncha; 6. d'approver il quint annuel da la comunitad dals vschins;
-------------	---

7. da decider davart vender, aliener, impegner ed agraver permanentamaing bains chi sun in proprietad da la comunitad dals vschins;
8. da cumprer bains cun egens mezs;
9. da der l'acconsentimaint per vender, aliener, impegner ed agraver dürabelmaing bains fundiaris chi'd haun appartgnieu già als 7 gün 1984 tar la facultad d'utilisaziun da la vschinauncha u chi sun gniesu acquistos scu cumpensaziun reela da tels bains;
10. da der l'acconsentimaint per retrer mezs our dal quint da revev da bains vendieus, scha'l dret chantunel prescriva la collavuraziun da la comunitad dals vschins.

Art. 20

Bannida
tractandas

La radunanza dals vschins vain bannida dal cussagl vschinel. A paun gnir trat decisiuns be sur dad affers chi figüran sülla glista da tractandas; quella ho da gnir publichedada almain 10 dis aunz cha'd ho lö la radunanza.

Art. 21

Abla per
trer decisiuns

Mincha radunanza dals vschins chi'd es convocheda in uorden po trer decisiuns.

Art. 22

Presidi

La radunanza dals vschins vain mneda dal prüm cuvih. In cas d'impedimaint vain la radunanza mneda dal seguond cuvih u dad ün oter commember dal cussagl vschinel.

Art. 23

Preparativ

La radunanza dals vschins po trer decisiuns be sur dad affers chi sun stos preparos dal cussagl vschinel u tres üna cumischiun speciela.

Art. 24

Scrutinaduors La radunanza dals vschins desegna ils scrutinaduors necessaris.

Art. 25

Tschernas e votaziuns Tschernas e votaziuns vegnan fattas aviertamaing. Ellas sun da fer in scrutin, scha ün dals votants preschaints dumanda quetaunt.

Tal prüm scrutin vela la magiurited absoluta, tar ün seguond scrutin quinta la magiurited relativa dals bigliets da vuscher valabels. Tar parited da vuschs decida la büs-cha. Tar votaziuns sur da chosas materielas es la dumanda affirmada, scha' l numer da las vuschs acceptantas surpasa la mited da las vuschs valablas, scha las vuschs sun in parited, schi es la dumanda refüседа.

Art. 26

Reponderaziun Üna decisiun da la radunanza dals vschins po a che temp chi saja gnir suottamissa ad üna reponderaziun. Arsalvo restan dreus da terzas personas.

Aunz cha'd es passo ün an daspö cha üna decisiun es entreda in vigur, esa d'entrer sün üna reponderaziun be scha tela vain decisa cun duos terzs da las vuschs.

B. Il cussagl vschinel**Art. 27**

Cumposiziun Il cussagl vschinel es l'organ executiv ed adminstrativ da la comunitated dals vschins.

El as cumpuona dal prüm cuvih e da quatter ulteriurs commembers ed ho duos suppleants. Il prüm cuvih vain tschernieu da la radunanza dals vschins. Dal rest as constituescha la suprastanza sves.

Art. 28

Tschantedas Il cussagl vschinel vain bannieu tres il prüm cuvih, u scha fo dabsögn, tres il seguond cuvih, e que uschè suvenz scu cha'ls affers dumandan.

Sün pretaisa da duos commembers dal cussagl vschinel es il prüm cuvih in dovair da bannir üna tschanteda extraordinaria.

Art. 29

Bannida La bannida ho da seguir almain 7 dis ouravaunt, indichand las tractandas. A vegnan bannieus tuot ils commembers dal cussagl e'ls suppleants.

Art. 30

Abel da trer decisiums Il cussagl vschinel es abel per trer decisiums, scha almain trais commembers sun preschaints. Scha commembers ordinaris sun impedieus da piglier part, schi vuschan ils suppleants in lur lö, e que illa sequenza seguond las vuschs obtgnidas u la düreda in uffizi u l'eted.

Art. 31

Votaziun e tschernas Per tuot las decisiums vela la magiurited absoluta dals commembers preschaints. Tar parited da vuschs decida il prüm cuvih, tar tschernas la bös-cha.

Mincha commember es oblio da der giò sia vusch. Arsalvedas sun las dispusiziuns davart l'exclusiun.

Art. 32

Cumpetenzas Il cussagl vschinel ho tuot las cumpetenzas chi nu sun delegedas tres dret federel u chantunel u tres ils statüts ad ün oter organ. El ho il dret d'incharger eir cumischiuns u la radunanza dals vschins cun singulas incumbenzas.

Ad el suprasto pustüt:

1. d'applicher ed executar decrets ed uordens federels e chantunels, ils statüts, ordinaziuns ed oters uordens da la comunitè dals vschins scu eir las decisiuns da la radunanza dals vschins;
2. d'administrar la facultè da la comunitè dals vschins chi'd es sia eina proprietè;
3. da statuir il quint annuel;
4. da preparar tuot ils affers a maun da la radunanza dals vschins;
5. da decider sur dad ün'expensa fin a fr. 10'000.-- per ün gener materiel e sur dad expensas da fin fr. 2'000.-- scha's tratta d'expensas chi tuornan minch'an;
6. da decider sur da mner process e fer recuors scu eir per fer accomodaments e contrats arbitrels;
7. da numner rapreschantants dals vschins in corporaziuns dal dret privat u dal dret public;
8. d'accepter nouvs vschins tenor la ledscha per l' aquist dal vschinedi.

Art. 33

Rapreschanter
vers l'extern

Il cussagl vschinel rapreschainta la comunitè dals vschins vers terzas persunas ed avaint güdisch.

Insembel cul nuder u ün oter commember dal cussagl vschinel suotascriva il prüm cuvih u sieu rimplazzant validamaing per la comunitè dals vschins.

Art. 34

Gestiun

Ils commembers dal cussagl vschinel haun da survaglier ils affers da lur champ d'administraziun ed haun d'agir d'uffizi scu cha que als pertuochoa ed haun da der referimaint losura al cussagl vschinel.

Trer decisiuns po be il cussagl tenor l'art. 30. Fatschendas da main importanza paun gnir surlaschedas dad evader tres il prüm cuvih sulet.

Art. 35

Il prüm cuvih Il prüm cuvih maina la radunanza dals vschins e presidiescha las tschantedas dal cussagl vschinel.

El prepara la glista da tractandas per las tschantedas dal cussagl. El pisserescha, scha que fo dabsögn, cun la collavuraziun dals oters commembers dal cussagl, cha las decisiuns trattas vegnan execute-das.

In cas d'urgenza po el per precauziun piglier imsüras provisorias.

Il prüm cuvih rapreschainta la corporaziun vschinela vers l'extern.

Art. 36

Burser Il burser maina la contabilted ed ils quints da la comunited dals vschins. Il quint da l'an es da serrer giò pels 31 da december.

Art. 37

Nuder Il nuder maina il protocol sur da las trattativas, votaziuns e tschernas illa radunanza dals vschins ed illas tschantedas dal cussagl vschinel. Ils protocols approvovos ho el dalum da purter aint i'ls relativs cudeschs da protocol.

C. Ils revisuors da quint**Art. 38**

Revisuors La radunanza dals vschins tscherna per mincha perioda d'uffizi ordi-
da quint naria duos revisuors da quint ed ün suppleant.

A la fin da mincha gestiun annuela examineschan ils revisuors da quint ils quints e la gestiun da l'an cumprais eventuelas chaschas specielas separedas.

III. L'administraziun da la faculted

Art. 39

Administraziun da la faculted Cun ün' administraziun adatteda pisserescha la comunited dals vschins cha sia faculted vegna mantgnida e ch'ella hegia ün bun rechev.

Art. 40

Fuond da reserva Il rechev our da la vendita da bains fundiaris da la faculted dals vschins ho dad ir in ün fuond da reserva ed ho in prüma lingia da servir per s'acquirer üna cumpensaziun reela.

Art. 41

Conto da rechev tres vendita da bains Il rechev tres la vendita da faculted d'utilisaziun crouda in ün conto da rechevs tres vendita da bains; quel vain adminstro da la vschinauncha politica.

Per retrer mezs our da quist fuond daun norma las dispusiziuns da la ledscha chantunela da vischinaunchas.

Art. 42

Rendaquint Il quint d'administraziun e da faculted cumprais il rapport dals revisuors da quint po gnir retrat tal burser il pü bod 10 dis aunz la radunanza da vschins.

IV. Disposiziuns finelas e transitorias

Art. 43

Revisiun Quists tschantamaints paun a tuot temp gnir revais interamaing u per part. Mincha revisiun aintra in vigor cun la decisiun d'acceptaziun.

Art. 44

Il term vschin cumpiglia adüna tuots duos geners.

Art. 45

Derogher Ils tschantamaints aintran in vigor sch'els sun gnies acceptos da la
disposiziuns radunanza vschinela dals 4 december 2006
cuntradictorias

Ushè decis da la radunanza dals vschins dals 4 december 2006

Il prüm cuvih:

Carl Chasper Lüthi



Il nuder:

Göri Klainguti

**Ledscha davart il dret vschinel
da la comunitè dals
vschins da Samedan**

Ledscha davart il dret vschinel da la comunitad dals vschins da Samedan

dals 03 december 2018

La radunanza generela da la comunitad dals vschins da Samedan decida

a basa da l'art. 19 cif. 4 dals tschantamaints da la comunitad dals vschins da Samedan, l'art. 90 al. 1 lit. a da la ledscha da vschinaunchas dal chantun Grischun (LV; DG 175.050) e l'art. 3 da la ledscha davart il dret da burgais dal chantun Grischun (LDBchant; DG 130.100):

Art. 1 Oget

Quista ledscha regla la procedura da natüralisaziun confuorm a la ledscha chantunela davart il dret vschinel.

Art. 2 Pretaisas da domicil e premissas da natüralisaziun per personas estras illa procedura da natüralisaziun ordinaria

¹ A personas estras po gnir garantieu il dret vschinel da la vschinauncha, sch'ellas sun stedas domiciliedas sainz'interrupziun düraunt 5 ans illa vschinauncha da Samedan aunz cu inoltrer la dumanda.

² In cas cha la düreda dal domicil illa vschinauncha da Samedan s'amunta totelmaing ad almain 12 ans, bastan 2 ans da domicil directamaing aunz cu inoltrer la dumanda.

³ Ultra da que haun els d'accumplir las ulteriuras premissas da natüralisaziun confuorm a la legislaziun dal dret vschinel federel e chantunel.

Art. 3 Pretaisas da domicil e premissas da natüralisaziun per Svizras e Svizzers illa procedura da natüralisaziun ordinaria

¹ A Svizras e Svizzers chi sun domicilios sainz'interrupziun daspö almain 5 ans illa vschinauncha da Samedan aunz cu inoltrer la dumanda po gnir garantieu u concess il dret vschinel cumünel, scha:

a) la reputaziun da dret penel nun es turbleda in maniera gravanta (art. 18 ODBchant);

b) els accumpleschan lur obligs finanziels;

c) els nu retiran üngün'assistenza sociela.

² In cas da domicil da totelmaing almain 12 ans illa vschinauncha da Samedan bastan in mincha cas 2 ans da domicil aunz cu inoltrer la dumanda.

Art. 4 Cumpetenzas

¹ Il cussagl vschinel es cumpetent per la realisaziun da quista ledscha. El comunichescha in scrit als petents la decisiun davart la dumanda da natüralisaziun. La procedura as drizza tenor il dret chantunel (art. 27 fin art. 29 ODBchant).

² La giunta da natüralisaziun cun trais commembers chi vain instituida dal cussagl vschinel examinescha las dumandas da natüralisaziun. Ella invida a las personas petentas ad ün discuors da qualificaziun per examiner impustüt l'integraziun e la famigiarited i'l sen dals art. 5 e 6 LDBchant in colliaziun cun l'art. 6 da l'ordinaziun tar la LDBchant (ODBchant; DG 130.110). In cas motivos po la giunta da natüralisaziun propuoner al cussagl vschinel da dumander la deliberaziun da quist oblig tar l'uffizi chantunel cumpetent (art. 26 al. 2 ODBchant).

³ Il cussagl vschinel fixescha ils detagls da la procedura da natüralisaziun, las cumpetenzas dal cussagl dals burgais e da la giunta da natüralisaziun in ün reglamaint.

⁴ In cas cha la natüralisaziun es gnida obtgnida cun astuzcha in dand infurmaziuns sbagliedas u in zuppantand fats relevants, comunichescha il cussagl vschinel que al chantun infra 5 ans daspö la natüralisaziun (il pü tard infra 8 ans confuorm a l'art. 36 da la ledscha federela davart il dret da burgais LDB; DS 141.0).

Art. 5 Taxas

¹ Per decisiuns e proceduras da natüralisaziun vegnan inchaschedas taxas chi cuvernan ils cuosts. Il cussagl vschinel decretescha la reglamentaziun correspudenta.

² El po fixer differentas pauschelas per cas per Svizras e Svizzers resp. per personas estras. Per renatüralisaziuns paun gnir fixedas pauschelas pü bassas. Las pauschelas sun d'adatter periodicamaing a las expensas effectivas.

³ Il cussagl vschinel po redür u relascher taxas per iffaunts minorens chi nu vegnan natüralisos insembel cun lur genituors, per personas in scolaziun scu eir in cas d'acziuns.

⁴ Per elavurer las dumandas da natüralisaziun po gnir inchascheda ün'anticipaziun dals cuosts ill'otezza da la mited da la pauschela per cas.

Art. 6 Protecziun giuridica

Decisiuns negativas sun da motiver e da munir cun ün'indicaziun dals mezs leghels.

Art. 7 Entrer in vigur

La preschainta ledscha es gnida approveda in occasiun da la radunanza dals vschins dals 03 december 2018 ed aintra in vigur retroactiva als 01. schner 2018. Ella rimplazza la ledscha davart il dret vschinel dals 29 avuost 2006.

In nom dal cussagl vschinel da Samedan

Il prüm cuvih



Dumeng Clavuot



Il nuder



Andri Lüthi

**Procedura
da natüralisaziun**

Procedura da natüralisaziun

Art. 1 Cumpetenzas

Examinaziun tres il secretariat da stedi per la migraziun

Il secretariat da stedi per la migraziun examinescha

- *scha la petenta u il petent periclitescha la sgürezza interna ed externa da la Svizra;*
- *scha sun avaunt maun indicaziuns concretas per partecipaziun, sustegn, promoziun u ingaschamaint süls secturs da terrorissem, extremissem, criminalited organisada u servezzans da noviteds scumandos;*
- *las inscripziuns i'l register penel VOSTRA.*

Examinaziun tres l'uffizi da migraziun e da dret civil dal Grischun

L'uffizi da migraziun e da dret civil dal Grischun examinescha

- *l'observaziun dals termins da domicil;*
- *la reputaziun penela;*
- *l'integrasiun linguistica (la cumprouva cun la documentaziun es da consegnar insembel cun l'inoltraziun);*
- *scha la documentaziun es cumpletta;*
- *eventuelmaing fo l'uffizi ün'examinaziun preliminarera materiela, in cas cha sun avaunt maun impedimaints da natüralisaziun evidaints.*

Examinaziun tres il cussagl vschinel resp. tres la giunta da natüralisaziun

Il cussagl vschinel resp. la giunta da natüralisaziun examineschan

- *scha'l center da la vita as rechatta a Samedan;*
- *scha'l petent es famiglier cun las relaziuns federelas, chantunelas e cumünelas;*
- *scha l'integrasiun es reuschida;*
- *scha sun avaunt maun excepziuns confuorm a l'art. 20 ODBchant.*

Art. 2 Repartiziun da las incumbenzas traunter il cussagl vschinel e la giunta da natüralisaziun

Il cussagl vschinel tschern a üna giunta da natüralisaziun cun 3 commembers, a la quela fo part ex officio il prüm cuvih.

La giunta da natüralisaziun

- dumanda las infurmaziuns da referenza confuorm al seguaint art. 3;
- examinescha la documentaziun da la dumanda;
- invida al discuors da natüralisaziun; e
- maina il discuors da natüralisaziun.

Zieva cha sieus sclerimaints sun glivros fo la giunta da natüralisaziun la proposta al cussagl vschinel. Il cussagl vschinel decida davart la dumanda da natüralisaziun.

Art. 3 Retscherchas tres la communitad dals vschins

La giunta da natüralisaziun fo infra 6 mais zieva l'entreda da la dumanda da natüralisaziun las retscherchas chi sun necessarias per valüter las premissas da natüralisaziun. Que sun specielmaing:

- *Procurer infurmaziuns da las autoriteds (administraziun cumünela, uffizi da servezzan sociel, autorited da scoula, post d'AI, intermediaziun da lavur regiunela eui.)*
- *Infurmaziuns da referenza dal patrun da lavur, patrun da giarsunedi, magister, terzas persunas eui.*

La giunta da natüralisaziun decida a basa dals documaints avaunt maun scu eir a basa da sias cugnuschentschas da las relaziuns persunelas dal petent, da che autoriteds resp. da che persunas cha sun da dumander infurmaziuns resp. infurmaziuns da referenza.

Art. 4 Examinaziun dal center da la vita in speciel

Il domicil d'üna persuna as rechatta al lö, inua ch'ella as trategna cun l'intenziun d'abiter permanentamaing (art. 23 CCS). Quist center da la vita es da sclerir da la giunta da neutralisaziun impustüt tres las seguintas retscherchas:

- *Indicaziuns davart la düreda e la frequenza dal sogiuorn a l'adressa d'abiter (la persuna chi vuol gnir natüraliseda stu as tratgnair düraunt almain 6 mais l'an a l'adressa d'abiter indicheda);*
- *Indicaziuns davart da l'ambiant sociel (circul da famiglia, amihs e collegas, commembranzas da societeds eui.);*
- *Indicaziuns davart la situaziun d'abiter a l'adressa d'abiter scu eir dal sogiuorn düraunt l'eivna (grandezza da l'abitaziun, decoraziun da l'abitaziun eui.);*
- *Dumander infurmaziuns da referenza impustüt tar la dumanda da la relaziun cun la vschinauncha da domicil;*
- *extrats dals contos da banca e da posta dals ultims 2 ans;*
- *rendaquint da la carta da credit dals ultims 2 ans;*
- *extrat dal diari da discuors dal furnitur svizzer da telefonia mobila;*
- *rendaquint dals cuosts d'electricited, da s-chudamaint e dals cuosts secundars.*

Art. 5 Preparaziun dal discuors da natüralisaziun

Zieva cha la documentaziun confuorm a l'art. 3 dal preschaint reglamaint es avaunt maun, invida la giunta da natüralisaziun al discuors da natüralisaziun. In vista a quist discuors vegnan ils petents intimos d'as preparar impustüt cun la broschüra «Die Schweiz verstehen» (<https://www.hep-verlag.ch/schweiz>). Impü as dessan ils petents preparar pel discuors da natüralisaziun impustüt a basa da las publicaziuns dal chantun Grischun e da la vschinauncha da Samedan (incl. preschantaziuns i'l internet) scu eir tres contacts persunels.

Tuot ils petents chi haun cumplieu il 12. an da vita sun da tadler persunelmaing e daperse.

In cas motivos po la giunta da natüralisaziun propuoner al cussagl vschinel da dumander da l'uffizi da migraziun e da dret civil la dispensaziun da quist oblig.

Art. 6 Decuors e cuntgnieu dal discuors da natüralisaziun

Il discuors da natüralisaziun dess der sclerimaint, scha las premissas da natüralisaziun materielas sun accumulidas. l' discuors da natüralisaziun sun da sclerir in detagl impustüt las seguaintas dumandas resp. las seguaintas cugnuschentschas:

- *Cugnuschentschas da basa da las relaziuns geograficas, politicas e socielas da la Svizra, dal chantun e da la vschinauncha da natüralisaziun*
- *Partecipaziun a la vita sociela e culturela i'l chantun ed illa vschinauncha da natüralisaziun;*
- *Examiner la rait sociela, impustüt ils contacts cun Svizras e Svizzers;*
- *Dumandas davart l'integrasiun, impustüt davart la sgürezza publica e l'uorden giuridic;*
- *Respetter las valuors fundamentelas da la costituziun federela, nempe ils princips dal stedi da dret, l'uorden fundamentel liberel democratic, l'egualited dad hom e duonna, il dret da la vita e da la liberted persunela, liberted da cretta e da conscienza, liberted d'exprimer l'opiniun, oblig da fer servezzan militer u servezzan civil da cumpensaziun;*
- *Partecipaziun a la vita economica ed a l'acquist da furnaziun, q.v.d. dumandas davart la piazza da lavur, la furnaziun eui.;*
- *Dumandas davart las relaziuns finanzielas;*
- *Dumandas davart la promoziun da l'integrasiun dals commembers da famiglia.*

Art. 7 Decisiun

Il cussagl vschinel decida infra 6 mais daspö l'entreda da la dumanda da l'uffizi da migraziun e da dret civil sün proposta da la giunta da natüralisaziun davart la garanzia dal dret da burgais cumünel.

Illla decisiun dal cussagl vschinel vegnan indichedas las persunas, a las quelas vain garantida la natüralisaziun, cun prenom, nom e data da naschentscha, a vegnan fixedas las taxas ed indichos ils mezs leghels. L'indicaziun dals mezs leghels tuna scu segua:

Confuorm a l'art. 26 LDBchant po gnir fat recuors al tribunal administrativ dal chantun Grischun, Plessurstr. 2, 7000 Cuira, e que infra 30 dis daspö la consegna. Il recuors stu cuntgnair ils fats, üna pretaisa da dret ed üna motivaziun. El es da suottascriver e d'inoltrer in duos exemplers, cun l'aggiunta dals mezs da cumprouva e cun quista decisiun.

La decisiun es da munir cul lö e la data.

Illa decisiun po gnir manzuno cha la persuna pertucheda possa desister in scrit da mezs leghels.

Art. 8 Procedura zieva la decisiun da garanzia dal cussagl vschinel

Subit zieva la scadenza dal termin pels mezs leghels resp. in cas chi'd es avaunt maun üna renunzcha al mez leghel do il president da la giunta da natüralisaziun inavaunt la dumanda a l'uffizi da migraziun e da dret civil cun las seguaintas aggiuntas:

- Actas chantunelas;
- Rapport da retschercha detaglio ed implieu our cumplettamaing;
- Tuot las examinaziuns fattas da la comunitè dals vschins;
- Decisiun cun vigur leghela;
- Extrat dal protocol dal cussagl vschinel, i'l quèl vain decis davart la garanzia;
- Scu eir ulteriuras actas ütilas.

Art. 9 Procedura in cas cha las premissas da natüralisaziun nu sun accumulidas

La giunta da natüralisaziun po sistir la procedura, p. ex. in cas da perdita da la piazza da lavur, scha que as muossa in occasiun dal discuors da natüralisaziun cha las cugnuschentschas fundamentelas sun insufficiaintas eui.

Als petents es que da comunicher in scrit, perche cha la giunta da natüralisaziun intenziunescha da propuoner al cussagl vschinel da refüser la dumanda, resp. da sistir la dumanda. A listess mumaint po que gnir arcumando als petents da retrer la dumanda. In mincha cas as stu der l'occuriun als petents da s'exprimer in scrit davart las ponderaziuns da la giunta da natüralisaziun.

In cas cha la dumanda vain retratta, decretescha il cussagl vschinel üna disposiziun da stricheda a basa d'üna proposta da la giunta da natüralisaziun.

In cas cha la dumanda vain mantgnida, melgrô cha que nu do üngüna sprauza, propuona la giunta da natüralisaziun al cussagl vschinel da decreter üna decisiun negativa. Davart quista proposta decida il cussagl vschinel.

Zieva cha quista decisiun dal cussagl vschinel ho vigur leghela sun las actas da natüralisaziun da restituir a l'uffizi da migraziun e da dret civil.

Samedan, ils 21 schner 2019

In nom dal cussagl vschinel da Samedan

Il prüm cuvih



Dumeng Clavuot



Il nuder



Andri Lüthi

**Ordinaziun davart
las taxas da natüralisaziun
da la comunitè dals vschins da Samedan**

Ordinaziun davart las taxas da natüralisaziun da la comunitad dals vschins da Samedan

A basa da l'art. 25 da la ledscha davart il dret da burgais dal chantun Grischun (LDBchant; DG 130.100) e da l'art. 7 da la ledscha davart il dret vschinel da la comunitad dals vschins da Samedan decretescha il cussagl vschinel la seguainta ordinaziun da taxas:

Per la natüralisaziun vegnan da princip inchaschedas las seguaintas taxas per persuna:

Art. 1 Persunas estras

A. Persuna creschida	CHF	2'000.00
B. Persuna minorena	CHF	500.00

Art. 2 Svizras e Svizzers

A. Persuna creschida	CHF	1'000.00
B. Persuna minorena	CHF	250.00

Art. 3 Taxas in cas da garanzia tralasheda u refüsa dal dret da la comunitad dals vschins

In cas cha la dumanda nu vain glivreda tres garanzia u concessiun dal dret vschinel, paun gnir pretaisas taxas pü bassas.

Art. 4 Antecipaziun dals cuosts

Il cussagl vschinel po pretender ün'antecipaziun dals cuosts.

Samedan, ils 21 schner 2019

In nom dal cussagl vschinel da Samedan
prüm cuvih


.....
Dumeng Clavuot



il nuder


.....
Andri Lüthi